

Manfaat kesan globalisasi

Koperasi mampu kukuh peranan dalam ekonomi negara Asia Pasifik

Laporan Azman Zakaria

KUALA LUMPUR: Datuk Seri Abdullah Ahmad Badawi mahu koperasi negara Asia Pasifik mengambil peluang sepenuhnya daripada kesan globalisasi untuk mengukuhkan peranan mereka dalam ekonomi di negara masing-masing.

Perdana Menteri berkata, koperasi yang mempunyai sumber dan kapasiti perlu berusaha meningkatkan pendapatannya dengan membabitkan diri dalam sektor eksport.

Katanya, usaha International Co-operative Alliance (ICA) menganjurkan pesta perdagangan koperasi pertama di Tehran pada Oktober 2006, adalah langkah pertama ke arah mewujudkan rangkaian perdagangan koperasi global.

"Untuk terus melangkah ke depan, saya harap lebih banyak usaha dilaksanakan meneruskan inisiatif ini.

"Berikutan pergerakan koperasi adalah berasaskan ahli, maka ia cenderung menumpukan kepada isu domestik menyebabkannya sukar untuk memperluaskan aktivitinya melampaui sempadan negara.

"Ini menyebabkan koperasi tidak berkembang dan memperluaskan operasi untuk merebut peluang ekonomi," katanya ketika merasmikan Persidangan Menteri-Menteri Koperasi Asia Pasifik Ke-8 di Pusat Konvensyen Kuala Lumpur (KLCC) di sini, semalam.

Turut hadir Menteri Pembangunan Usahawan dan Koperasi, Datuk Seri Mohamed Khaled Nordin dan Presiden ICA, Ivano Barberini.

Persidangan anjuran bersama Kementerian Pembangunan Usahawan dan Koperasi, ICA dan Angkatan Koperasi Kebangsaan Malaysia Bhd (Angkasa) selama empat hari sehingga Khamis ini dihadiri kira-kira 300 peserta tempatan dan wakil 21 negara anggota ICA serta 11 negara pemerhati. Ia bertemakan Kesaksamaan Globalisasi Menerusi Kerjasama Koperasi.

Abdullah berkata, pada peringkat kebangsaan, koperasi boleh memainkan peranan dengan mengenal pasti kumpulan khusus yang tanpa sedar tertinggal dalam mobilisasi sumber yang semakin berkembang dari luar bandar ke bandar.

Justeru, katanya, koperasi perlu diwujudkan antara lain di kalangan kumpulan seperti belia, wanita, pesara dan golongan istimewa.

"Di kawasan luar bandar, koperasi boleh memainkan peranan dengan meningkatkan pembabitannya ahli dalam sektor pertanian, selain membantu pembangunan setempat dan membasmi kemiskinan.

"Dengan ini, koperasi boleh melaksanakan peranan dalam mewujudkan dan melaksanakan pembangunan mapan di kawasan luar bandar; seterusnya menyumbang kepada peningkatan pendapatan penduduk," katanya.



JALIN KERJASAMA: Abdullah merasmikan Persidangan Menteri-Menteri Koperasi Asia Pasifik Ke-8 sambil disaksikan Mohamed Khaled (kanan), Ivano (kiri) Presiden ICA-AP, Li Chun Seng (dua kiri) dan Presiden Angkasa, Prof Dr Ali Bahrom di Pusat Konvensyen Kuala Lumpur (KLCC), semalam.